

Zastupjerjo nowin narodnych mjeńšin so zetkali

## Na swójsku identitu kedźbować

Vasa (SN/MWj). Medije a kubłanje su nimo staršiskeho domu najwaźniše při dale posrědkowanju rěče. Tole rjekny Kjell Herberts, sociologist šwedskeje uniwersity w finskim měsće Vasa, tydženja na zetkanju zastupjerjow dženikow narodnych mjeńšin z wjacorych europskich krajow. Runje za mjeńšiny je tole eksistencielne prašenje, dokelž dyrbjja wone na swoju identitu kedźbować.

Nimo redaktora Serbskich Nowin Mariana Wjeńki wobdźělichu so na tydzenskim zetkanju Madžarojo z Rumunskeje a Słowakskeje, Němc a Słowjenka z Italskeje a Katalana ze Španiskeje. Přeprošyło je jich europske zjednoćenstwo dženikow narodnych mjeńšin Midas. Přednoški, diskusijine koła a ekskursije organizowali su sobudźěłačerjo šwedske-

rěčneje nowiny Vasabladet, kotraž we Vasy a wokolinje w nakładze něhdže 25 000 eksemplarow wuchadźa.

Na juhu Finskeje wokoło stolicy Helsinkow, na juhozapadze wokoło Vasy kaž tež na kupje Åland bydli něhdže 290 000 šwedsce rěčacych Finow. Mjeztym zo je kupa Åland jednorěčnje šwedska, stej tamnej regionaj ryzy dwurěčnej. Tam njesu jenož nadržne tafle, pućniki a napisy na zjawnych twarjenjach w šwedskej a finskej rěči wuhotowane, ale tež busowe plany, pomjenowanje wobchodow, jědźne karty w hosćencach atd.

Šwedsce rěčacy Finojo maja w dwurěčnych kónčinach swojeho kraja ryzy šwedske kaž tež dwurěčne pěstowarnje, w kotrychž nałožuja metodu dospołneje imersije. Dale maja šwedske šule a samo



Wobdźělnicy zetkanja w finskim měsće Vasa wopytachu mjez druhim šwedski telewizijny sćelak.

Foto: M. Wjeńka

ryzy šwedsku uniwersitu. Šwedska ludowa strona je w finskim parlamence kaž tež w knježerstwje zastupjena. Hłowna zhromadźizna Midas, kotraž wotmě so před lětomaj w Budyšinje, budže lětsa w meji w rumunskim měsće Clui.